



Komunikadu Imprensa
Munisípiu Baukau
23 Fevereiru 2024

**JSMP kontinua hanaruk Programa Apoiu Seguransa Komunitáriu
(PASK) ho Suku Uma-Ana-Ulu liuhosi asina Nota Entendimentu**

Iha 15 Fevereiru 2024, JSMP kontinua Asina Nota Entendimentu ka *MoU* ho Suku Uma-Ana-Ulu, Postu Administrativu Venilale, Munisípiu Baukau ba fulan 6 (neen) iha tinan 2024.

Nota de Entendimentu ne'e estabese entre parte rua ho objetivu atu kontinua aseguira komunikasaun no koordenasau ne'ebé di'ak entre parte rua durante implementasaun atividade PASK no mós bele aseguira katak atividade sira ne'ebé mak hala'o ne'e tuir duni objetivu programa ne'e rasik.

"JSMP gradese tebes ba xefe suku ho estrutura tomak ne'ebé durante tinan ida nia laran koopera di'ak tebes iha programa Apoiu Seguransa Komunitáriu no liuhosi parte rua nia kolaborasaun ne'e konsege responde buat balun tuir atividade sira ne'ebé konkorda hamutuk ona. Lori JSMP nia naran, hakarak nafatin agradese ba konfiansa nune'e ohin lora bele asina tan nota entendimentu ba kontinuasaun serbisu hamutuk iha programa hanesan iha futuru nune'e komunidadade sira bele asesu ba justisa tantu iha nível komunitáriu no nasional," dehan Sra. Ana Paula Marçal, Diretora Ezekutiva JSMP.

Administradór Postu Venilale, Sr. Jose Freitas Boavida iha ninia intervensaun haktuir katak agradese tebes ba JSMP tanba durante tinan ida JSMP nia programa ne'e hamutuk ona ho Suku Uma-Ana-Ulu no sei haluan tan ba Suku Uma-Ana-Iku no Suku Fatulia, ho nune'e husu ba JSMP atu kontinua haluan tan ba suku seluk iha Munisípiu Baukau liuliu Postu Administrativu Venilale.

Administradór postu ne'e hatutan mós katak komunidadade sira barak mak hetan problema maibé sira laiha koñesimentu no la hatene dalan oinsa atu lori sira nia kazu hodi rezolve iha justisa formál no agradese tebes ba JSMP nia prezensa bele serbisu hamutuk ho Suku Uma-Ana-Ulu no bele ajuda buka informasaun kona-ba komunidadade sira nia kazu ne'ebé mak iha Polísia, MP, tribunál, hodi bele lori filafali informasaun sira ne'e ba iha komunidadade no mós lideransa suku sira.

Entretantu Komandante Eskuadra Venilale, Sr. Sebastião Freitas iha nia intervensaun haktuir katak durante tinan ida serbisu hamutuk ho JSMP, JSMP ajuda ona PNTL ninia knaar balun. Ho nune'e Eskuadra prontu atu kontinua kolabora ho JSMP hodi bele implementa programa JSMP nian iha suku Uma-Ana-Ulu, tanba konsidera programa ne'e importante tebes no bele ajuda

lideransa suku sira no mós polísia sira hodi fasilita comunidade sira asesu ba justisa formál.

Iha parte seluk, Xefe Suku Uma-Ana-Ulu, Sr. Narciso da Costa Belo, iha ninia intervensaun hato'o agradese bo'ot tebes ba JSMP, tanba bele continua hala'o programa ne'e iha nia suku no liuhosi asina MoU ohin loron prontu atu continua kolabora ho JSMP iha futuru tanba konsidera programa ne'e importante tebes.

Xefe suku continua subliña katak programa ne'e importante tebes tanba ho objetivu atu fasilita comunidade sira bele asesu informasaun relasiona ho sira nia kazu, fahe informasaun kona-ba lei aplikável sira nune'e comunidade kompriende kona-ba regra Tara-Bandu, prosesu justisa formál inklui ajuda estrutura suku sira bele rezolve problema disputa sira iha suku laran.

Xefe suku konsidera prezensa JSMP nian liuhosi programa ne'e durante tinan ida nia laran iha tinan 2023 hetan rezultadu pozitivu tebes tanba hosi programa ne'e comunidade iha Suku Uma-Ana-Ulu hetan informasaun sira kona-ba justisa formál, estrutura suku sira mós iha ona koñesimentu kona-ba justisa formál no nafatin kolabora hamutuk ho JSMP hodi buka solusaun ba iha comunidade sira nia problema sira iha suku laran.

Programa ne'e rasik realiza ho objetivu atu tulun comunidade lokál sira no intervenente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu no ema hotu-hotu bele asesu iha nivél komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polísia tribunál, prokuradoria ba iha suku sira tarjetu
4. Advokasia atu hadi'ak liután ligasaun comunidade sira ho justisa formál
5. Fahe informasaun kona-ba asesu ba sistema justisa formál
6. Sei introdus *Case Log* ba Konsellu suku sira no OPS kona-ba oinsa atu priense formulariu kazu sira.

MoU ne'e asina hosi Diretora Ezekutiva JSMP Sra. Ana Paula Marçal no Xefe Suku Uma-Ana-Ulu representa hosi Sr. Narcisio da Costa Belo no akompaña hosi Administradór Postu Venilale, Sr. Jose Freitas Boavida, no Komandante PNTL Eskuadra Venilale Sr. Sebastião Freitas no akompaña mós hosi xefe aldeia, lia-nain, OPS no delegada feto ho mane, Juventude Feto no Mane, Membru Veteranu Makaleha Maksabar sira hosi Suku Uma-Ana-Ulu.

Atividade ne'e, realiza hosi JSMP, liuhosi programa Apoiu Seguransa komunitária (PASK) tamba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor -Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>